

## 每週經課朗誦經文(巴克禮漢羅/教羅)2013/05/26

### 共同經課 - 1 箴言八章一節～四節，二十二節～三十一節

1 智慧 kiám 無 teh 叫？聰明 kiám 無出聲？2 伊 tī 路邊高地 ê 頂面，Tī 十字路口 teh khiā。3 Tī 城門邊，tī 城門口，Tī 城出入 ê 所在，大聲叫講，4 眾人 ah，我叫 lín，我 òng 世間人出聲。22 Tī 耶和華造化 ê 起頭，Tī 極起頭創造 ê 事先，我是 I 所有。23 Tùi 永遠，tùi 極起頭，未有世界 ê 事先，我已經受設立。24 未有深淵，未有 choē-choē 水 ê 水泉，已經生我。25 大山未定 tiòh，小山未有 ê 事先，已經生我。26 耶和華 iáu 未創造大地 kap 田野，以及地上土粉 ê 原質。27 祂建立 chiah-ê 天；設圓環 tī 深淵 ê 頂面；28 頂面安置穹蒼；堅固深淵 ê 水泉；29 Kā 海定 tiòh 界限；Hō 水無 poá<sup>n</sup> 過伊 ê 命令；定 tiòh 大地 ê 根基，我 kap 伊 tī-teh。30 hit 時我 tī-hia 做師傅-頭；日日 hō伊歡喜，常常 tī 伊面前快樂；31 Tī thang khiā 起 ê 地快樂；也 kap 世間人相 kap 歡喜。

### 共同經課 - 2 詩篇八篇

1 大衛 ê 詩，交 hō樂官，用 Ka-tèk ê 樂器；1) 耶和華阮 ê 主 ah，你 ê 名 tī 全地到 chiah 高大！你將你 ê 榮光排設 tī 天裡。2 你因為你 ê 對敵 ê 緣故，tùi 嬰 á kap 食奶 ê 嘴，建立能力；Beh hō對敵 kap 報冤 ê 靜靜。3 我看你 ê 天，你 ê 手所造 ê，Kap 你所排列 ê 月 kap 星；4 世間人是甚麼，你 siàu 念伊？人 ê kiá<sup>n</sup> 是甚麼，你眷顧伊？5 你 hō伊比天使釐 á khah 輸，Koh 賞賜伊榮光尊貴做冕旒。6 你設立伊管理你 ê 手所造 ê，Hē 萬物 tī 伊 ê 腳下；7 就是一切 ê 羊 kap 牛，山野 ê 走獸；8 天中 ê 鳥，海內 ê 魚，Kap 見若經過海裡 ê 路 ê，lóng hē tī 伊 ê 腳下。9 耶和華，阮 ê 主 ah，你 ê 名 tī 全地到 hiah 高大！

### 共同經課 - 3 羅馬書五章一節～五節

1 所以咱已經 tùi 信稱做義，就對咱 ê 主耶穌基督有 kap 上帝和；2 也 oá 靠伊，tùi 信來入 tī 現今所 toà ê 恩典，koh òng 望上帝 ê 榮光來歡歡喜喜。3 M-nā án-ni，就 tī 患難也歡歡喜喜，因為知患難生出吞忍；吞忍生出老練；4 老練生出 òng 望；也 òng 望無致到見笑；5 因為上帝 ê 疼 tùi 所賞賜咱 ê 聖神來灌 ak 咱 ê 心。

### 共同經課 - 4 約翰福音十六章十二節～十五節

12 我 iáu 有 choē-choē 項 beh kā lín 講，獨獨 lín 現今當 boē 起。13 到真理 ê 神來，伊 beh chhoā lín 入 tī 一切 ê 真理；因為伊 m̄ 是 beh 憑家已來講；是將伊所 beh 聽見 ê 來講；koh beh 用 teh-beh 來 ê 事報 lín。14 伊 beh 榮光我；因為伊 beh tùi 我所有 ê 領受；來報 lín。15 凡若父所有 ê lóng 是我 ê；所以我講，伊 beh tùi 我所有 ê 領受，來報 lín。